

**Cua yuav ntsawj mus tog twg los yeej tsis muaj leejtwg txwv tau. Koj hnov suab nrov tiamsis cua tuaj qhovtwg tuaj lossis cua yuav mus qhovtwg, koj yeej tsis paub. Ib yam nkaus li ntawd koj yeej tsis paub hais tias, txhua tus uas Vajtswv tus Ntsujplig yug, nws yug lawv li cas.**

Nikaudemaus nug Yexus hais tias, "Yuav ua li cas muaj tau raws li tej uas koj hais ko." Yexus teb hais tias, "Koj twb yog cov neeg lxayees ib tug xibhwb uas sawvdaws hwm ne, ua cas koj tseem tsis tau paub tej no?"

**Kuv qhia tseeb rau koj hais tias, peb hais tej uas peb paub thiab qhia tej uas peb pom xwb, txawm yog li ntawd los, nej cov tsis muaj ib tug ntseeg tej lus uas peb qhia.**

Kuv hais txog tej uas nyob hauv ntiajteb no xwb, nej twb tsis ntseeg. Yog kuv tseem hais txog tej uas nyob saum ntuj Ceebtsheej thiab, cais nej haj yam yuav tsis ntseeg. Yeej tsis tau muaj leejtwg mus saum ntuj Ceebtsheej ib zaug li, tsuas yog neeg Leejtub tus uas nqis saum ntuj Ceebtsheej los tib leeg mus xwb.

**Luag yuav muab neeg Leejtub dai rau saud ib tug ncej ib yam li thaum ub Mauxes muab nab tooj dai rau saum ncej tom tiajrag suabpuam.**

Neeg Leejtub yeej yuav raug dai li ntawd, txhua tus uas ntseeg nws thiaj li tau txojhia ntev mus ib txhis,

**Rau qhov Vajtswv hlub neeg ntiajteb kawg li, nws thiaj li txib nws tib leeg tub los rau hauv ntiajteb, Tus uas ntseeg nws Leejtub, tus ntawd yuav tsis raug kev ploj kev tuag, tiamsis nws yuav tau txojhia ntev mus ib txhis. (Yauhas 3:1-16)**

## **380**

### **MUAB YUS TUS KHEEJ RAU VAJTSWV SIV**

Cov kwvtij es, vim Vajtswv hlub peb kawg nkaus li, kuv thov ntuas nej txhua tus hais tias, thaum nej tseem ua neeg nyob no, nej yuav tsum muab tagrho nej lub cev pub rau Vajtswv siv teevtiam nws thiab ua tej uas haum nws siab, nej ua li ntawd thiab yog nej hawm Vajtswv tiag.

**Nej tsis txhob ua nej lub neej zoo li tej neeg uas tsis nloog Vajtswv lus niajhnuv ua, tiamsis nej yuav tsum cia Vajtswv hloov nej lub siab, kom nej muaj lub siab tshiab. Yog nej ua li ntawd nej yuav paub ua zoo raws li Vajtswv lub siab nyiam. (Loo 12:1-2)**

Vajtswv twb tsa nej nrog Yexus Khetos sawv hauv qhovtuag rov qab los lawm. Yog li ntawd nej yuav tsum ntsia ntsoov tej uas nyob saum Ceebtsheej, uas yog qhovchaw Yexus Khetos zaum saum lub rooj ntawm Vajtswv sab xis. Nej yuav tsum muab siab npuab tej uas nyob saud, tsis yog yuav muab siab npuab tej uas nyob hauv ntiajteb no.

**Rau qhov nej zoo li cov neeg uas tuag lawm, Vajtswv muab nej txojhia zais nrog Yexus Khetos ua ke.**